

REGIONAL NEWS UNIT  
ALL INDIA RADIO, AGARTALA  
Date: 01-04-2024  
Time: 07:55-08:05 PM Hrs  
BENGALI EVENING BULLETIN

---

Headlines :

- (১) রাজ্যে গত দুইদিনের ঝড় বৃষ্টিতে ক্ষতিগ্রস্তদের প্রশাসনের তরফে দ্রুত সহায়তা প্রদানের ব্যবস্থা করা হয়েছে ।
- (২) প্রধানমন্ত্রী নরেন্দ্র মোদি আজ বলেছেন যে আগামী ১০ বছরে ভারতকে অর্থনৈতিকভাবে স্বনির্ভর হতে হবে যাতে বিভিন্ন বৈশ্বিক কারণে দ্বারা খুব বেশি প্রভাবিত না হয় ।
- (৩) টিসিএ পরিচালিত রাজ্যভিত্তিক অনূর্ধ্ব ১৩ বছরের ক্রিকেট প্রতিযোগিতায় সদর-বি চ্যাম্পিয়ন হয়েছে ।
- (৪) রাজ্যভিত্তিক অনূর্ধ্ব-৯ বছরের দাবা প্রতিযোগিতায় বালক বিভাগে পীতম্বর দেবনাথ এবং বালিকা বিভাগে নাভিয়া দে অপরাজিত চ্যাম্পিয়ন হয়েছে ।

\*\*\*\*\*

**Disaster Management :**

রাজ্যে গত দুইদিনের ঝড় বৃষ্টিতে ক্ষতিগ্রস্তদের প্রশাসনের তরফে দ্রুত সহায়তা প্রদানের ব্যবস্থা করা হয়েছে। রাজ্য সরকারের বিপর্যয় মোকাবেলা দপ্তরের সচিব বৃজেশ পাণ্ডে আজ মহাকরনে এক সাংবাদিক সম্মেলনে একথা জানান। তিনি বলেন, গত ৩০ ও ৩১ মার্চের কালবৈশাখীর ঝড়, বজ্রপাত, বৃষ্টি, শিলাবৃষ্টিতে

রাজ্যের বিভিন্ন এলাকায় ক্ষয় ক্ষতি হয়। অন্তত ৮০০ বাড়ি ক্ষতিগ্রস্ত হয়েছে। এর মধ্যে ৫৭৭টি বাড়ি আংশিক, ১৬১টি বাড়ি মারাত্মক ক্ষতি, ও ৬২টি বাড়ি সম্পূর্ণ ভাবে ক্ষতিগ্রস্ত হয়েছে। ৪২টি স্থানে গাছ ভেঙে পড়ে রাস্তা বন্ধ হয়, ২০৫টি জায়গায় বিদ্যুৎ সরবরাহ ব্যবস্থা বিঘ্নিত হয়েছে। ইতিমধ্যেই রাস্তা অবরোধ মুক্ত করা হয়েছে, অধিকাংশ এলাকায় বিদ্যুৎ সরবরাহ ব্যবস্থা স্বাভাবিক করা গেছে। আজ রাতের মধ্যে বাকী এলাকায় বিদ্যুৎ সরবরাহ স্বাভাবিক হবে বলে তিনি আশা প্রকাশ করেছেন। তিনি জানান, বজ্রপাতে উদয়পুরে একজনের মৃত্যু হয়েছে। ক্ষতিগ্রস্ত পরিবারগুলোকে মহকুমা প্রশাসন থেকে তাৎক্ষনিক সাহায্য হিসাবে ৪০০০ টাকা থেকে ৫০০০ টাকা অর্থ সাহায্য করা হয়েছে।

\*\*\*\*\*

**PM :**

প্রধানমন্ত্রী নরেন্দ্র মোদি আজ বলেছেন যে আগামী ১০ বছরে ভারতকে অর্থনৈতিকভাবে স্বনির্ভর হতে হবে যাতে দেশ বিভিন্ন বৈশ্বিক কারণের দ্বারা খুব বেশি প্রভাবিত না হয়। মুম্বাইতে ভারতীয় রিজার্ভ ব্যাঙ্কের ৯০বছর পূর্তি উপলক্ষে আয়োজিত অনুষ্ঠানে প্রধানমন্ত্রী একথা বলেন। প্রধানমন্ত্রী বলেন, আরবিআই তার পেশাদারিত্ব এবং প্রতিশ্রুতির জন্য বিশ্বে পরিচিত।

কেন্দ্রীয় অর্থমন্ত্রী নির্মলা সীতারামন এবং অর্থ প্রতিমন্ত্রী ভাগবত কিষণরাও কারাদ এবং পঞ্চজ চৌধুরীও এই অনুষ্ঠানে অংশ নেন।

অনুষ্ঠানে আরবিআই এর গভর্নর শক্তিকান্ত দাস বলেন, একটি প্রতিষ্ঠান হিসাবে রিজার্ভ ব্যাঙ্কের বিবর্তন ভারতীয় অর্থনীতির বিকাশের সঙ্গে ঘনিষ্ঠভাবে জড়িত।

\*\*\*\*\*

#### **All Party meeting-Sepahijala :**

সিপাহীজলা জেলা শাসক অফিসের সভাগৃহে আজ এক সর্বদলীয় বৈঠক অনুষ্ঠিত হয়। এই বৈঠকে নির্বাচন কমিশনের সাধারণ পর্যবেক্ষক ও সিপাহীজলা জেলার জেলা নির্বাচনী আধিকারিক তথা জেলাশাসক নাগেশ কুমার বি উপস্থিত ছিলেন। বৈঠকে বি.জে.পি, সি.পি.আই.এম, কংগ্রেস ও তিপ্রা মথা দলের প্রতিনিধিরা অংশ গ্রহণ করেন। বৈঠক শেষে নির্বাচন কমিশনের পর্যবেক্ষক ভূপেশ চৌধুরী আমাদের সিপাহীজলা জেলার সংবাদদাতা অভিজিৎ বর্ধনকে জানান, এই জেলায় লোকসভা নির্বাচনের যাবতীয় প্রস্তুতি সন্তোষজনক।

\*\*\*\*\*

#### **Election, training :**

লোকসভা নির্বাচন উপলক্ষে আজ দুপুরে খোয়াই টাউন হলে ভোট কর্মীদের প্রশিক্ষণ অনুষ্ঠিত হয়। উপস্থিত ছিলেন জেলাশাসক চাঁন্দনী চন্দ্রান, খোয়াই মহকুমা ম্যাজিস্ট্রেট মেঘা জৈন, অতিরিক্ত জেলাশাসক কেশব কর সহ অন্যান্য আধিকারিকরা। এক সাক্ষাৎকারে জেলাশাসক জানিয়েছেন, রামচন্দ্রঘাট, খোয়াই এবং আশারাম বাড়ী এই তিনটি বিধানসভা এলাকার ভোটের কাজে নিয়োজিত সমস্ত কর্মচারী ও

আধিকারিকদের নিয়ে হাতে-কলমে নির্বাচন প্রক্রিয়া সংক্রান্ত প্রশিক্ষণের ব্যবস্থা করা হয়েছে।

\*\*\*\*\*

**Loksabha Election-2024-UNAKOTI :**

ঊনকোটি জেলাতে আসন্ন লোকসভার সাধারণ নির্বাচনকে সামনে রেখে জোর প্রশাসনিক প্রস্তুতিপর্ব চলছে। উল্লেখ্য পূর্ব ত্রিপুরা সংসদীয় আসনের অন্তর্গত ঊনকোটি জেলার ২২৫টি পোলিং বুথে ভোটগ্রহণ করা হবে আগামী ছাব্বিশে এপ্রিল। ঊনকোটি জেলার জেলা নির্বাচন আধিকারিক তথা জেলা শাসক দিলীপ কুমার চাকমা আজ এক সাক্ষাৎকারে জানান, আসন্ন নির্বাচন উপলক্ষ্যে ঊনকোটি জেলার জেলা শাসকের অফিসে ২৪ ঘণ্টার জন্য একটি কন্ট্রোল রুম চালু করা হয়েছে। এর টোল ফ্রি নম্বর হচ্ছে ১৯৫০। আসন্ন নির্বাচন উপলক্ষ্যে ঊনকোটি জেলাতে মোট ১৩৫০ জন ভোটকর্মী নিয়োগ করা হয়েছে। ইতিপূর্বে তাদের প্রথম পর্যায়ের প্রশিক্ষণ কর্মসূচি অনুষ্ঠিত হয়েছে। তিনি জানান, এখন পর্যন্ত জেলাতে C-vigil এর মাধ্যমে একটিমাত্র অভিযোগ পাওয়ার নির্ধারিত একশ' মিনিটের মধ্যেই তা নিষ্পত্তি করা হয়েছে।

\*\*\*\*\*

**All party Meeting :**

অষ্টাদশ লোকসভা নির্বাচনে পশ্চিম ত্রিপুরা লোকসভা কেন্দ্রের অন্তর্গত শান্তিরবাজার বিধানসভা ও পূর্ব ত্রিপুরা লোকসভা আসনের অন্তর্গত জোলাইবাড়ি বিধানসভা আসনে অবাধ ও শান্তিপূর্ণভাবে ভোটগ্রহণ সম্পন্ন করতে আজ শান্তিরবাজার মহকুমা শাসকের অফিসে এক সর্বদলীয় সভা হয়। শান্তিরবাজার

বিধানসভা কেন্দ্রের সহকারী রিটার্নিং অফিসার অভেদানন্দ বৈদ্যের পৌরাহিত্যে সভায় জোলাইবাড়ি বিধানসভা কেন্দ্রের সহকারী রিটার্নিং অফিসার দেবজ্যোতি রায়, মহকুমা পুলিশ আধিকারিক সৌগত চাকমা, বাইখোড়া ও শান্তিরবাজার থানার দুই ওসি সহ বিজেপি, কংগ্রেস, সিপিআইএম, সিপিআই ও তিপ্রামথা দলের প্রতিনিধিরা উপস্থিত ছিলেন।

\*\*\*\*\*

### **Election Preparation Dhalai :**

আসন্ন লোকসভা নির্বাচনকে কেন্দ্র করে প্রশাসনিক স্তরে ব্যাপক তৎপরতা শুরু হয়েছে ধলাই জেলায়। আমবাসা বিধানসভা কেন্দ্রের এ আর ও তথা আমবাসা মহকুমা শাসক সঞ্জিত দেববর্মা জানিয়েছেন, জেলায় পুরোদমে নির্বাচনী প্রস্তুতি শুরু হয়ে গেছে। তিনি বলেন, এই সময়ের মধ্যে দুই কোম্পানি সি আর এ পি এফ জেলায় পৌঁছেছে। পোলিং স্টেশনও একেবারে প্রস্তুত। স্ট্রং রুমের নির্মাণ কাজও সম্পন্ন হয়ে গেছে। বিভিন্ন জায়গায় বসানো হয়েছে নাকা। ২৪ ঘন্টা সেখানে নজরদারি রয়েছে।

\*\*\*\*\*

### **Airport Authority of Indiaia :**

এয়ারপোর্ট অথরিটি অফ ইন্ডিয়া আজ ২৯তম প্রতিষ্ঠা দিবস। এই উপলক্ষে আগরতলা মহারাজা বীর বিক্রম বিমানবন্দরে একাধিক কর্মসূচি হাতে নেয়া হয়েছে। আজ আয়োজিত রক্তদান শিবিরের উদ্বোধন করেন এয়ারপোর্ট অথরিটি অফ ইন্ডিয়া আগরতলা শাখার অধিকর্তা কে সি মীনা। এছাড়াও উপস্থিত ছিলেন CISEF আগরতলা শাখার ইনচার্জ ধরমবীর সাই, আগরতলা

বিমানবন্দরের সিনিয়র ম্যানেজার স্মিতা প্রকাশ সহ এসিস্টেন্ট  
জেনারেল ম্যানেজার এইচ এস জেম্পু সহ অন্যান্যরা।

\*\*\*\*\*

**B. L Santosh :**

বিজেপির জাতীয় সাংগঠনিক সাধারণ সম্পাদক বি এল সন্তোষ  
আগামীকাল দুইদিনের রাজ্য সফরে আসছেন। সফরকালে তিনি  
দলের বিভিন্ন সভায় অংশ নেবেন বলে প্রদেশ বিজেপি সূত্রে  
জানানো হয়েছে।

\*\*\*\*\*

**Electrtion Campaign :**

২টি লোকসভা আসনের নির্বাচনী লড়াইয়ে আজ রাজ্যে বিভিন্ন  
স্থানে বিভিন্ন দল জনসংযোগ ও সভা করে। ভোটারদের বাড়ি  
বাড়ি গিয়ে প্রচারেও জোর দিয়েছে রাজনৈতিক দলের নেতারা।  
এদিকে রামনগর বিধানসভা কেন্দ্রের উপনির্বাচনে শাসক বিজেপি  
ও প্রতিদ্বন্দ্বি সিপিআই এমের প্রার্থীদেরকে আজ বিধানসভা  
কেন্দ্রের বিভিন্ন এলাকায় জনসংযোগ করতে দেখা গেছে। প্রার্থীরা  
ভোটারদের বাড়ি বাড়ি গিয়ে ভোট প্রার্থনা করেছেন।

\*\*\*\*\*

**CPIM-South :**

পূর্ব ত্রিপুরা লোকসভা আসনে ইন্ডিয়া জোট সমর্থিত সিপিআইএম  
প্রার্থী রাজেন্দ্র রিয়াংকে সঙ্গে নিয়ে আজ জোলাইবাড়ি বিধানসভা  
এলাকায় দিনভর নির্বাচনী প্রচার করেন বিরোধী দলনেতা জিতেন্দ্র  
চৌধুরী। কোয়াইফাং বাজার, পূর্ব পিলাক, আচাইছি মগ পাড়া ও

সূর্যবাড়িতে নির্বাচনী সমাবেশে বক্তব্য রাখেন বিরোধী দলনেতা জিতেন্দ্র চৌধুরী, প্রার্থী রাজেন্দ্র রিয়াং ও প্রাক্তন বিধায়ক যশবীর ত্রিপুরা প্রমুখ।

\*\*\*\*\*

#### **BJP-Ramnagar :**

লোকসভা নির্বাচনী প্রচারের অঙ্গ হিসাবে আজ বিজেপি'র উদ্যোগে রামনগর বিধানসভা কেন্দ্রের বিভিন্ন এলাকায় পদযাত্রার আয়োজন করা হয়। উপস্থিত ছিলেন পশ্চিম ত্রিপুরা লোকসভা আসনের বিজেপি প্রার্থী, সাংসদ বিপ্লব কুমার দেব, রামনগর বিধানসভা উপনির্বাচনের বিজেপি প্রার্থী পুর নিগমের মেয়র দীপক মজুমদার, পর্যটন মন্ত্রী সুশান্ত চৌধুরী। তাছাড়া আজ বিজেপির উদ্যোগে রাজনগর স্কুলে পৃষ্ঠাপ্রমুখ সম্মেলন অনুষ্ঠিত হয়।

\*\*\*\*\*

#### **Congress-South :**

পশ্চিম ত্রিপুরা লোকসভা আসনে ইন্ডিয়া জোটের কংগ্রেস প্রার্থীর সমর্থনে আজ বিলোনিয়া শহরের ১নং টিলা, আর্ষকলোনি, মাইছড়া, চিত্তামারা, পাইখোলা, উত্তর ভারতচন্দ্র নগর, ঈশানচন্দ্রনগর, ইত্যাদি এলাকায় সভা ও পদযাত্রা অনুষ্ঠিত হয়। সভাগুলিতে উপস্থিত ছিলেন কংগ্রেস প্রার্থী আশীষ কুমার সাহা, বিধায়ক দীপংকর সেন ও অশোক কুমার মিত্র।

\*\*\*\*\*

#### **Rally of BJP Kishan Morcha at Khowai :**

বিজেপি কিষান মোর্চার উদ্যোগে আজ খোয়াই সিঙ্গিছড়া শরৎচন্দ্র দ্বাদশ শ্রেণী বিদ্যালয় মাঠে এক নির্বাচনী জনসভা অনুষ্ঠিত হয়। জনসভায় বক্তব্য রাখেন খোয়াই জিলা পরিষদের সভাপতি জয়দেব দেববর্মা, প্রদেশ বিজেপি সভাপতি রাজীব ভট্টাচার্য, কিষণ মোর্চার রাজ্য সভাপতি প্রদীপ বরণ রায়।

\*\*\*\*\*

#### **Joint meeting of BJP, Tipra Motha, IPFT :**

লোকসভা নির্বাচনকে সামনে রেখে আজ খোয়াই শহরে বিজেপি, তিপুরা মথা ও আই.পি.এফ.টি দলের খোয়াই জেলা নেতৃত্বের যৌথ সমন্বয় বৈঠক অনুষ্ঠিত হয়। উপস্থিত ছিলেন জনজাতি কল্যাণ মন্ত্রী বিকাশ দেববর্মা, বনমন্ত্রী অনিমেঘ দেববর্মা, মুখ্য সচেতক কল্যাণী রায় সহ অন্যান্য নেতৃবৃন্দ।

\*\*\*\*\*

#### **Utkal Diwas-Governor :**

আগরতলার মুক্তধারা অডিটোরিয়ামে আজ উৎকল দিবস উদযাপন করা হয়। এই অনুষ্ঠানে রাজ্যপাল ইন্দ্রসেনা রেড্ডি নাল্লু উড়িষ্যার কৃষ্টি সংস্কৃতি পর্যটনের অগ্রগতি সম্পর্কে বিস্তারিত উল্লেখ করেন। অনুষ্ঠানে উপস্থিত ছিলেন ত্রিপুরা উড়িয়া সমাজের সভাপতি বিষ্ণুচরণ পতি, সম্পাদক রবীন্দ্র কুমার মহাপাত্র।

\*\*\*\*\*

#### **Disaster Management :**

দক্ষিণ পশ্চিম মৌসুমি বায়ুর প্রভাবে ঝড়বৃষ্টি ও কালবৈশাখী মোকাবিলায় আগাম প্রস্তুতি হিসাবে আজ শান্তিরবাজার মহকুমা

শাসকের অফিসে মহকুমা বিপর্যয় মোকাবিলা কর্তৃপক্ষের এক সভা অনুষ্ঠিত হয়। মহকুমা শাসক অভেদানন্দ বৈদ্যের পৌরহিত্যে সভায় পুলিশ সহ বিভিন্ন দপ্তরের আধিকারিকরা উপস্থিত ছিলেন। মহকুমা শাসক সব দপ্তরকে দক্ষিণ পশ্চিম মৌসুমি বায়ুর প্রভাবে ঝড়বৃষ্টি ও কালবৈশাখী মোকাবিলায় আগাম প্রস্তুতি নেওয়ার নির্দেশ দেন।

\*\*\*\*\*

#### **Cyclone affected at Unakoti :**

কালবৈশাখী ঝড়ে গত চব্বিশ ঘণ্টায় ঊনকোটি জেলাতে ক্ষয়ক্ষতির ঘটনা ঘটেছে। জেলায় ১৯টি বসত ঘরের আংশিক ক্ষতিগ্রস্ত হয়েছে বলে জানিয়েছেন, জেলার বিপর্যয় মোকাবিলা বিভাগের জেলা প্রোগ্রাম আধিকারিক শুভজিৎ নাথ।

\*\*\*\*\*

#### **State wise 13 Cricket :**

টিসিএ পরিচালিত রাজ্যভিত্তিক অনূর্ধ্ব ১৩ বছরের ক্রিকেট প্রতিযোগিতায় সদর-বি চ্যাম্পিয়ন হয়েছে। আজ আসরের ফাইনালে সদর-বি ৬ উইকেটে সদর-এ দলকে পরাজিত করে। রাণীরবাজার মাঠে সদর-এ ব্যাট করতে নেমে ৩৪ ওভার ২ বল-এ সবকটি উইকেট হারিয়ে ৮১ রান করে। জবাবে সদর-বি ৩০ ওভার ৫ বল-এ ৪ উইকেট হারিয়ে জয়ের লক্ষ্যে পৌঁছে যায়।

\*\*\*\*\*

#### **Under-9 Chess :**

রাজ্যভিত্তিক অনূর্ধ্ব-৯ বছরের দাবা প্রতিযোগিতায় বালক বিভাগে পীতাম্বর দেবনাথ এবং বালিকা বিভাগে নবা দে অপরাজিত চ্যাম্পিয়ন হয়েছে। এন এস আর সি সি-র দাবা হলঘরে রাজ্য দাবা সংস্থা আয়োজিত আসর হয় দুদিনের। বালক বিভাগে ৫ রাউন্ডের খেলায় সাড়ে ৪ পয়েন্ট পেয়ে পীতাম্বর চ্যাম্পিয়ন ও আদ্রুষ কর্মকার রানার্স হয়। বালিকা বিভাগে ৪ রাউন্ডে সাড়ে ৩ পয়েন্ট পেয়ে অপরাজিত চ্যাম্পিয়ন হয়েছে নাভিয়া দো। ৩ পয়েন্ট পেয়ে আদ্রিজা সাহা রানার্স হয়।

\*\*\*\*\*

#### **T20 Cricket :**

টিসিএ পরিচালিত সমীরণ চক্রবর্তী স্মৃতি ঘরোয়া টি-২০ ক্রিকেট প্রতিযোগিতা আগামীকাল থেকে শুরু হচ্ছে। প্রথম দিনে বিভিন্ন মাঠে পাঁচটি খেলা হবে। আসরে মোট ১৪টি দল অংশ নিয়েছে। গ্রুপ লিগ কাম নকআউট পদ্ধতিতে চ্যাম্পিয়নশীপের ফয়সলা হবে।

\*\*\*\*\*

#### **Cricket-Dhalai :**

কমলপুর কালীবাড়ী ক্রিকেট মাঠে কমলপুর ক্রিকেট এসোসিয়েশন পরিচালিত সিনিয়র ক্রিকেট টুর্নামেন্টে ফাইনাল ম্যাচে আজ ডিয়ার ক্লাব আপনজন ক্লাবকে পরাজিত করে। আপনজন ক্লাব প্রথমে ব্যাট করতে নেমে সব কয়টি উইকেট হারিয়ে ২৯ ওভার ১ বলে মোট ৮৩ রান করে। পাল্টা খেলতে নেমে ডিয়ার ক্লাব ২১ ওভারে ৫ উইকেট হারিয়ে জয়ের জন্য প্রয়োজনীয় রান তুলে নেয়।

\*\*\*\*\*

### **Belonia Senior Cricket :**

বিলোনিয়া মহকুমা ক্রিকেট এসোসিয়েশন আয়োজিত সিনিয়র ডাবল লীগ কাম নক আউট ক্রিকেট টুর্নামেন্টের আজকের ম্যাচে জয়পুরের স্বামী বিবেকানন্দ সোস্যাল সেন্টার ১৪১ রানের ব্যবধানে ইয়ুথ স্কোয়ারকে পরাজিত করে। বিদ্যাপীঠ মাঠে অনুষ্ঠিত এই ম্যাচে প্রথমে ব্যাট করতে নেমে স্বামী বিবেকানন্দ সোস্যাল সেন্টার নির্ধারিত ৩৫ ওভারে ৭ উইকেটের বিনিময়ে ২৩৮ রান সংগ্রহ করে। জবাবে খেলতে নেমে ২০ ওভার ২ বলে সব উইকেট হারিয়ে ইয়ুথ স্কোয়ার মাত্র ৯৭ রান করে।

\*\*\*\*\*

### **Women's Cricket :**

টিসিএ পরিচালিত মহিলাদের ঘরোয়া একদিনের সীমিত ওভারের ক্রিকেট প্রতিযোগিতার ২টি খেলায় আজ এডি নগর কোচিং সেন্টার ও ব্লাডমাউথ ক্লাব জয়লাভ করেছে। তালতলা মাঠে ব্লাডমাউথ ক্লাব ২৭৫ রানে মৌচাক কোচিং সেন্টারকে এবং মেলাঘরে এডি নগর কোচিং সেন্টার ১০ উইকেটে ক্রিকেট অনুরাগী কোচিং সেন্টারকে হারিয়ে দেয়।

\*\*\*\*\*

### **Weather :**

আগামী চব্বিশ ঘণ্টায় রাজ্যের সব জেলায় বিক্ষিপ্তভাবে বজ্র বিদ্যুত সহ বৃষ্টি সঙ্গে ঘণ্টায় ত্রিশ থেকে চল্লিশ কিলোমিটার বেগে ঝড়ো হাওয়া বয়ে যাওয়ার সতর্কতা জারি করেছে আবহাওয়া দপ্তর। আগামীকাল আকাশ আংশিক মেঘাচ্ছন্ন থাকবে। দুয়েক

জায়গায় বজ্র বিদ্যুত সহ হালকা থেকে মাঝারি পর্যায়ে বৃষ্টিপাতের  
সম্ভাবনা রয়েছে। তাপমাত্রা সর্বোচ্চ চৌত্রিশ ডিগ্রী সেলসিয়াস এবং  
সর্বনিম্ন পঁচিশ ডিগ্রী সেলসিয়াস এর কাছাকাছি থাকবে। আজ  
দিনের সর্বোচ্চ তাপমাত্রা ছিল পঁয়ত্রিশ দশমিক চার ডিগ্রী এবং  
সর্বনিম্ন পঁচিশ দশমিক সাত ডিগ্রী সেলসিয়াস।

\*\*\*\*\*